

棟

亭

詩

鈔

荔軒草者侍中曹子清詩集也子清門第國勳長
江南佳麗地束髮即以詩詞經藝驚動長者稱神
童既舞象入爲近臣今始弱冠而其詩清深老成
鋒穎芒角篇必有法語必有源雖顛白齒搖拈鬚
苦吟不能逮其一二可不謂竒哉不佞徵車來長
安晤子清如臨風玉樹談若粲花甫曼倩待詔之
年腹嫻嫻二酉之秘貝多金碧象數藝術無所不
窺弧騎劍槊彈碁擘阮悉造精詣與之交溫潤伉
爽道氣迎人予益歎其才之絕出也蓋才之出于
天者自然而莫知其所至學焉而莫能企及焉故

其于詩有可學有不可學鑄格鍊字揚藹挖藻此
可以學得也亭臯木葉池塘春草此不可以學得
者也以絕人之姿加典學之力及其成就豈有量
際哉昔子建與淳于生分坐縱譚蔗杖起舞淳于
目之以天人今子清何多遜也李白贈高五詩謂
其價重明月聲動天門即以贈吾子清海內月旦
必以子言爲然已未四月朔黃公顧景星書于都
門旅次

與荔軒別五年同學者以南北爲修塗以出處爲
戶限每搔首曰荔軒何爲哉既而讀陳思仙人篇
詠閶闔羨潛光乃知陳思之心即荔軒之心未嘗
不爽然自失焉徂歲荔軒寄舟中吟一卷讀之如
對警咳欠伸而握手留連也蓋至今日始得敘曹
子之詩詩者曹子不可須臾離者也曹子以詩爲
性命肌膚於是導之引之抑之搔之輾轉反側恒
有詩魁壘鬱勃於胸中此精微爛金石視陳思何
異哉昔吾與論詩有才焉有學焉有識焉三百篇
之採風彤弓湛露棧車幽草榛苓茗華莫不有詩

經聖人排纂如出一手與觀羣怨合而多識鳥獸
草木渾鎔無跡四始分而君臣上下房中郊廟燦
若列眉非好學深思絕利一源者孰知之嗟乎起
陳思於今日吾恐不過如蔦蘿之松木寒號之不
凡而已荔軒知之宜乎不可須臾離詩然有說於
此雍丘之贈友也有劉楨王粲丁應爲唱酬有白
馬彪爲友于其求知已易易耳今曹子二千里外
寄訊於予如魚山天樂寫爲梵音此予所以欲箋
釋要眇爲之旁皇撫卷而不能已也荔軒之竒懷
道韻又寧獨才學識而已乎昔人品詩謂建安齊

梁諸才人皆有君子之心焉請以相曹子庶幾孟
氏誦詩知人之旨使徒賞其詩淵淵爾鏘鏘爾非
曹子所以命子者已些山學弟杜芥書時年七十
有三

言者心之聲也詩之爲言則尤出于心之自然而不可以模擬依傍者也荔軒先生家世通顯爲天子親臣乃被服儒素黽勉盡職不涉戶外一事故發之爲言蒼然以樸澹然以雋悠然以遠無論逐逐于歷下竟陵不屑闖其藩籬即以眉山劍南爭位置者自先生視之不啻如避秦人不知有漢無論魏晉焉獨是古今咏物無不以用意爲工如鄭鷓鴣袁白燕之屬字字刻畫以此得名而集中咏物諸作若在有意無意之間使人一唱三歎而始遇之則自少陵促織詩所謂久客得無淚故妻

難及晨外不能多觀也而人猶欲以模擬依傍相
求焉得乎遂太息而弁言其端遂安毛際可撰

杜子美言詩語不驚人死不休韓退之言詩橫空
盤硬語妥帖力排鼻而白傅期於老嫗都解張子
厚云致心平易始知詩陸務觀云詩到無人愛處
工羣賢之論若枘鑿之不相入者然其義兩是亦
就體製分殊爾今之詩家空疎淺薄皆由嚴儀卿
詩有別才非關學一語啓之天下豈有舍學言詩
之理棟亭先生吟藁無一字無鎔鑄無一語不矜
竒蓋欲抉破藩籬直闖古人窾奧當其稱意不顧
時人之大怪也先生於學博綜練習掌故胸中具
有武庫瀏覽全唐詩派多師以爲師宜其日進不

已譬諸蒟騶驥駮郭椒丁櫟騰山超澗馳騁既熟
下而縱送劇驂之區其樂有不可喻者已康熙乙
酉冬十月秀水同學弟朱彛尊書

詩自明初至今幾於四變洪武四家尚矣空同歷
下其失也浮竟陵矯之其失也細今則家稱韓白
變而南宋其失也狃甚而爲俗矣棟亭諸咏五言
今古體出入開寶之間尤以少陵爲濫觴故密咏
恬吟旨趨愈出七言兩體胚胎諸家而時闌入于
宋調取其雄快芟其繁蕪境界截然不失我法此
是其工力到家然非其天分過人氣格高妙亦不
能驅策古人爲我之用也歎賞之餘謹跋其後四
明教弟姜宸英

和程令彰十八夜飲南樓

聞雁

送亮生南還即和留別詩兼寄些山先生
些山有詩謝夢奉和二首時亮生已南旋
四月望夜得遲字

呼盧歌

飲溲酒

仲夏吳雪蓬自土木歸見枉有作

月涼茗飲歌

送程正路之黃陂丞兼懷赤方先生

鉅菊

插鉅菊夜供有感

咏後陶香爐

咏桐君木枕

咏次山藏劍

咏上若澄泥硯

冲谷四兄寄詩索擁臂圖並嘉子學天竺書

月夜書懷

小軒闢除已移居其中有懷子猷

西堂飲歸

南軒種竹

棟亭詩鈔卷一

千山曹寅子清謨

坐弘濟石壁下及暮而去

我有千里遊愛此一片石徘徊不能去川原俄向
夕浮光自容與天風鼓空碧露坐聞遙鐘冥心寄
飛翮

宿來青閣

襆被香寒夜氣濃五更月出海門紅愁人偏聽荒
雞唱烽火無邊歸夢中

曉起千峰霧不開怒潮捲雪蔽天來安能滿挽水

才言金卷一
犀弩直射山陰白馬回

時馬寇
猖獗

夢春曲

鴻雁歸矣可奈何春月脈脈生微波樓船萬石臨
中河飲酒逐景歡笑多翠袖出簾露纖手綠鬢紫
蘭夜香久寶瑟聲寒漏未央及春行樂猶恐後月
落長河白烟起美人歌歇春風裏夢轉微聞芳杜
香碧盡江南一江水

春日過顧赤方先生寓居

見因季子到堦前堂上先生尚晏眠逆旅藥香花
覆地長安日暖夢朝天開軒把臂當三月脫帽論

文快十年即此相逢猶宿昔頻來常帶杖頭錢

讀梅耦長西山詩

西山亘千里水石相絡繹結脈到幽州不盡迴蒼
碧眷彼高人駕一往空今昔杖履凌雲巔行歌弔
龍宅幽懷以竒騁佳境自茲闢我誦殘春篇慨焉
歎行役風露卧中宵車馬日枕藉愧與名山鄰羞
踐世人迹鬱鬱黃塵間狂吟聊自適

卧龍嶺

塞山如蛾眉雨洗青蒙茸我來值六月石路盤高
峰清風掃殘雲明霞淨秋容窈窕入無際望之開

卷之四 言金一
二
心胸回首見長河波濤正洶洶晝夜逝不息車馬
紛交衝惜茲白日晚悵望撫孤筇

曉遊潭柘寺

諸峰雲未開前途馬已駕逡巡飯行人縱覽忘深
夏幽光蒙青林輕陰散丹榭古跡不可追依稀見
殘柘坐聞流泉哀百折空亭下

不寐

月落林屋暗寒燈耿幽光鄰雞私呷喔冰聲裂方
塘旣醉復思夢神清愁亦忘曉車如秋潮雷鳴過
空堂塵役苦無厭俯躬自徬徨

人日和子猷二弟仲夏喜雨原韻

小閣昔年聽雨處
夜闌燈火對牀明
草魂未返江南夢
雁字初歸人日晴
屈指炎涼千里別
何時來往一身輕
釣車秧馬南郊外
共看靈湫徹底清

京中

初夏游烏龍潭爲盛事

射雉詞

少年十五十六時
關弓盤馬百事隳
不解將身事明主
惟愛射雉南山陔
山南麥熟不得實
青黃初接已生摘
山田久旱無人耕
老雞叫媒白晝行
隴頭峩峩行且舞
隴下絳冠力如虎
不惜二雄爲雌

死但言新試銅牙弩

葛漁城

清秋埜色曠遊子不能止
落日下高原驅車見墟
里萬柳一煙靜淼湖中水
湖水清且漣造酒醇
而旨烹此留底魚食彼塲上米
孤雲澹無營飛鳥
相與徙騁目悅初心暢悟達生理

趙北口

下馬問舟子手指籬邊舟
惠肯涉印否不遠到前
洲前洲多楊柳後洲鳧與鷗
印能操長楫擊汰向
中流水光浮上天羣魚入空游
惜無百尺絲繫此

一寸鉤野女見人咲秋草吹綠油回身感旅宦轅
轍何時休

病中吟

風梳病髮纔盈握藥畏寒梅香繞廬飢雀噪簷山
雪減凍蠅觸紙午窗虛

懷高澹人學士

危坐瞻鴉夕穿雲有數層暮塵窗外海寒月定中
僧易痼文園病曾分蕭寺燈相思常不見清冷玉
壺冰

胡進也木孩將移居南城

月沉風乍勁，撼屋一如舟。盡作懵騰睡，真成汗漫遊。
驚沙連廣漠，冷燭合蕭丘。來往寒城下，還能爲酒謀。

讀施愚山侍讀稿

疇昔攜尊處，斜陽依舊過。佳時聞大略，絕筆想餘波。
歲月窮經史，衣冠夢薜蘿。九原皆故舊，涕淚幾人多。

杜些山胡靜夫過訪

坐訝分牀慣，跣趺不異僧。清歡唯故麈，久約亦寒燈。
柝冷司人唱，尊餘釀者矜。長街何以贈，霜月白。

稜稜

雪霽次些山韻

春城人未着春衣
玉塔微瀾半夕暉
桃葉有情依舊凍
梅花無主不須歸
盤風雜鶻懸鈴出
鬧雪寒蛾應火飛
能是風流任來往
五陵從此盡輕肥
江山何許未彫殘
啾唧牆頭有紇干
十日歸鴻迷建業
萬行疎柳夢長安
花燈雜路迎春色
酒幟排空起暮寒
寄語羣兒休踏盡
好留明月盡情看

留別姚後陶

塞草江蘆青不同
浮生何限別離中
雄心作達深

杯見老眼題愁素紙空巷北樹涼扶杖過溪南水
好放船通相於正有園居約多送蒲颿八尺風

花笑軒步月留別蒲菴

獨行沙岸白江月逐人清細柳隨潮活危磯到寺
平鐘聲塵外夢花笑靜中情回向知何日風前惜
此生

黃河看月示子猷

高春澹微景露坐思南園不知明月光已照牆尾
藩濁浪無時休逆旅如煩寃怡然把瘦骨奮起憐
吹塤涓涓瀉醇酎秩秩羅寒燔視子負竒氣聽我

播清言清言亦可飽萬古多續緒惟此白玉鉤能
探崑崙源常儀惜輕垂碧靄滋餘暄豈鮮重淵龍
睥睨方蟠蜿亦有投林鵲素色含孤騫秋空自然
遠蟲候本相喧明明一勺水再顧失潺湲陰森浚
九地晃朗排三垣荒風括箕口細露灑高原與子
共此杯持身慎璵璠莫歎無榮名要當出籬樊

北行雜詩

野艇方離雨城隅花出欄一羣紅不賤六月水初
寬泥飲新荷葉叢歌舊棗竿猶憐波上燕未及渡

江看

微咏倚疎竹風清歌窅如開門飛白鴿彈指出朱
魚衣色迎涼改杯香近客徐無才甘飲飫落照兩
躊躇

浮生常不達霍霍視頭顱倚棹思千古迎風灑一
壺竒雲臨楚散修竹到淮無漁笛如知己憑陵爲
客呼

青旗來粵甲黃馬盡吳船魚麗難爲水蟻行不出
天人濤爭達旦神鬼雜多年截地曾無術蒼涼燈
火前

風水逆相鬪湖河乘間流幾時青黑土一夜白黃

頭勁翻摩霄退殘花觸石浮悠哉年少日安穩縱
驊騮

日氣挾飛燕蓬窗晚食時關河淒欲斷鉦鼓競相
持節候風來早鄉心馬去遲不眠空翦燭已照鬢
成絲

水鳥啼中夜朱霞晃一朝轉看婁亮舫清共許由
瓢秋草深何有寒城近不囂愁心與襪襪日日飯
魚苗

落日桃源外憑高一欠伸天河何必險塞雁不來
賓禿樹緱緣鳥平灘負戴人難將青草淚萬里問

蒼旻

過淮聲不斷八月竟無聞殘夢連風葉空城滿夕
曛人寰清可繼蟲介隱多文更欲芟秋草螿螂漫
合羣

泊腐無情化秋來似有心隨風多隱見濯浪不浮
沉萬里塞孤慢雙星帶一簪於斯將照乘得得慰
歸吟

楚蛩如恨客卧穩楸頭船白露看成霰青莎合共
羶更長蟾不進秋好蝶難翩送爾天西岍支機織
女邊

飄零雙鳳子顛倒着黃衣不散交鬚戲遙憐並體
飛雲香高冉冉波照落微微滿眼天涯草西園幾
日歸

蛾眉不自愛撲暗一蓬燈火猛何如吏心安即是
僧寒思銀色界白勝研光綾欲就纖纖月黃河浪
幾層

殘杯澆濁浪滾滾散清愁蟲鳥誰先得蛟龍難共
遊洪音趨下土素景逼高秋寥濶存真賞空餘百
尺樓

層陰孤月出返照下邳城去路秋將半思家眼倍

明齊波青玉色越櫓白鵝聲滿坐滄浪客從誰借
酒兵

齊魯語不辨城村時一經秋陽暴衣白晚棗墮船
青漸喜無蠅蚋相看有鵲鴿地圖還共指直北建
高瓴

扮榆不知社食肉媿儒冠朔曆看來少家書寄到
殘拂波無一燕落日倚孤灘

行在天山外西風玉帳寒

濟水寒無滓空多縮項編網眾充下澇城郭冒高
煙曉食觀須曠秋山坐不偏猶傷髀裏肉三月柁

樓前

同舟無主客歌泣不知頻
塵面由來假秋光即此
真雲霾深地肺虎豹據天津
明日黃花外莫囊意
倍親

野風吹側帽斷岸始登高
闊絕無鴻雁提攜有桔
槔清寒蕎麥氣哀響白楊
號掩淚看孤弟西山思
鬱陶

南池

滄海橫流亦有時紅塵今見古南池
青天秋老無人問九百年來八句詩

臨清聞聽水

無心噴礴亦昏晨
置爾歎峙磊落人
風角哀湍多
順耳船頭明月不
回身寒歸瀚海
年年淺秋入茅
簷事事新一悟
浮生燈影是彈冠
猶惜故鄉塵

喜葉桐初至

馬耳飛塵脫帽逢
眼中羸秀舊時容
詩惟滌穢囊
如洗温不增華客
是松乾鵲窺簷先
下直晴山照
市未高春坐來翻
灑傷心淚四月孤
亭棟影濃
論愁不厭亦天真
塵滿匡牀月滿身
已分雲霞成
過客漫將屠釣勸
間人文章光焰思
前輩冠蓋風

華接後塵從此預饒休沐暇與君唯有甕中春

一日休沐歌

一日休沐無所爲槽頭馬鳴草滿墀一日休沐無
所向森森潘陸隨車障我名何幸入通籍我胸何
苦抱岑寂君不見甕城東出河橋濱天街新雨道
少人右鄰季主左白墮中有深巷無囂塵巷深地
僻秋苔綠常時問飲不問卜但聞剥啄即同心何
況往來僮僕熟先生倔強復迂徐先生好客唯蔬
魚清時低賃伯通廡殘年高枕瞿曇書葉子同居
好心事精思妙語摩金翅程君磨盾亦竒才一揮

萬彙驅風埃人生友多不爲過牀前莫歎青瓊破
人生間少不須愁眼中西北有高樓高樓酒熱禹
中已五年落葉君須記高樓人冷日垂申十日一
別君休嗔諸君諸君慎相見長安容易改頭面隱
囊紗帽吾何戀不惜頻來布親串江南稻蟹饒西
風暫時擺脫嘲吳儂蒲帆數幅非難計且看芙蓉
映水紅

五月十一夜集西堂限韻

庭柯淨交枝落景罷炎蒸竭來延靜侶露頂如枯
僧微風播高談廣廈無飛蠅悠悠盛年歡默照歸

華燈

抱甕汲深井井深慄毛髮吁嗟寧爾爲將子結布
襪仲夏新麥登野飯趁涼滑惟應渾河舛艤舟酌
江月

十年披素紈相顧半老醜忽忽風霾中冠蓋去八
九荷衣野無式羽扇不離手磨利肘後章莫易杯
中酒

清塵隱高樹萬瓦光鱗鱗金吾勅雞犬疎鐘遞城
闈在昔鼓腹遊真意非等倫憐君納不借所愧皆
閑人

同羣富文藻風雅何翩翩
新知竭要眇妙句必林
泉欲試成連音牀琴久
無絃命兒讀豳風字字如
珠圓

送桐初

曼陀羅花開已謝鵲玉
軒前無客來西望太行
一杯酒此身還不厭塵埃

古北口中秋

山蒼水白卧牛城三尺
黃旗萬馬鳴半夜澶州
看秋月河山表裏更分明

涼夜不寐口占

沆瀣炎氛午夜平餘香猶炷一絲清風簷荔葉與
蕉葉時下空堂曳屐行

程霽堂至詩以慰之

客毛頰白盡相見惜庭柯弭佩三年改登階一揖
多微宵來鳥倦落日動烏叱暫止題襟淚江鄉近
若何

緩行淹水驛記別念山程雪片麻衣色風埃天馬
聲胸難消有故詩已到無情不娶非萊老全生苦
節貞

秋飲

驚飈翻白日塵影落簷際衆鳥何啁啾肅殺氣相
遞需生寡所歡妙理久沉泥滌慮期同懷觴政罷
苛細夕宇脫幘來澄光映羣髻實成文字飲咀嚼
窮六藝往者永嘉輩放蕩不可詣潘石許投分末
路有垂涕遐哉粉飾心對值勉秋霽一勺波瀾生
深淺各厲揭躋聖寧讓先忘筌久難諦君看大小
雅伯仲本同系故人粲菴芬房櫳閔幽蕙聆情獲
欣解豁目絕雲翳今古去無終茲樂杳難繼譬如
食甘蟲聯蠕隱微蒂至味了不減糟軀任銷蛻微
涼斂膚澤枕具少清憇醉醒非酢酬滄浪待鼓柂

過陳次山寓居讀迦陵稿有感

連牆苔色絕飛埃
手版閒拋破寂來
坐有茗柯酬夙好
篋無楮葉罷新裁
清華適俗能容嘯
少壯評交實愛才
忝與周旋非一日
銅官山冷桂枝開
短簷修榻對支頤
今古論文更不疑
此帙半從君手錄
爲郎猶及爾形衰
草深白版鳴蛙處
水長西橋浴馬時
風雅至今多絕響
迦陵遺調使人悲

圓廬

小擬穹廬迥絕鄰
白駒閒送陸行人
清埃不遠艤舟便
塞草江花總一春

簑形偃蓋一弓寬
樞戶清寥位置安
消得鳳城多少雪
貉裘氈被向來寒

田梅岑自南城來却贈

醉吟俱不輟
世許作狂猜
肩鋪行方並
春城飲却回
易眠氈屋煖
相待草橋開
花事耽餘子
同時尚有梅

隱者皆株列
長安咲捉衿
枯匏容一扣
掌劍有微音
居隔連街樹
清如冠雪岑
頻傷飛動意
爭免鬢毛侵

題杜亮生鈎竿吟

杜生囊中釣竿吟清冷激耳非凡音
眾舉罩仰世相向五十未改滄浪心
孤生之竹獨絲繭披裘澤畔空
洪涇六鰲連擲大何求尺半鯉魚牛足趺
構巢兩架西枝曲縞衣憶傍蘆中宿
照面澄江深不深年年雪滿枯槎腹
枯槎不爛天東注豈有桃花無覓處
臨風三嗅鮑魚羹爲君擊碎珊瑚樹

十八夜對月與子猷作

古瓦修柯蔭舍南參差城郭迫
淒含自窺塵面幾經缺閒握顛毛
相向談清漏稀聞如碎地深杯一
照即澄潭眼花竟欲窮霄上避弋
啣蘆影二三

題次山小軒和姜萬青韻

打頭伸欠爾何堪矮屋長眠擬劍南
頻憶書堆當料理泥塗十日謝朝驂

提沽責約有王褒

謂植夫

鄰堵相瞻雞共號能俟秋吟

通蟋蟀眼前脫略逐時豪

我結精廬一鉢圓春陰三里接飛綿
長安來往無他適異日風流絕可憐

車似雞栖屋似車胡琴撞碎興何如
君家陽羨猶堪說紫棟花開石首初

和程令彰十八夜飲南樓

客心搖落傍孤筇步屨隨時向酒家寒靚朔天高
絕雨秋闌燕市急催花離鄉渾識飄零雁在世宜
看早晚鴉能置歲華杯勺裏一帆終古浩無涯
十八城東破月輪淨街清影杖邊身風搖亭幔無
三里路隔棋盤又一旬紈袴實能呵醉尉鷓冠終
是聚浮塵爲君古淡非今日泥飲醇醪味得真

聞雁

羣飛日日謝江湖過眼風花迹也無十萬樓臺三
市靜月明端坐兩狂夫

送亮生南還卽和留別詩兼寄此山先生

風廊微照兩啣杯能待城闈簇騎回婪尾易消爲
別酒隔年不卸有函梅園搖素奈辭春艷柁換清
江下泐洄山步若邀斑杖健北湖長望惜莓苔

些山有詩謝夢奉和二首時亮生已南旋
述夢龍城雪予慚尚有心書來期不見形在覺何
深薦甲敷春老疑蕉數葉吟俗情占反復草閣倘
重尋

首夏江流穩吳帆望不孤歸翻先客夢杖只倩孫
扶隱几餘清晝乘車合異塗遽然如可待還寫掃

花圖

予留別有願爲筇竹杖之句此山集
青蓮句有閒爲仙人掃落花故及之

四月望夜得遲字

孰爲耽幽暇齋東退直遲清宵愁伏枕鞶帶強題
詩夏木承初影岑樓納一規乾坤方北戶端照莫
移時

呼盧歌

白日無根月有窟奕世身名悲汨沒健聞時輩逐
時歡輟食臨風罷嗟咄邨南游客羣翱翔傾囊一
擲觀堵牆袒呼不辨王與李施緋拖綠鬚眉張塵
埃萋萋矜能事實過屠門圖快意家無擔石握拳
來十年富貴磨竒氣程不識郭細侯禿纓蒯劍徒

悠悠谷量牛馬豈能計蓬蘽英雄多白頭

飲溲酒

眷言酌昆友陶然知水竒麴蘖豈一端醇酎毋乃
茲沉湎滑稽內適俗恒澆漓今夕數帆健滿引誰
當之寒泉伏百里憶出孤竹時俯飲自厥古哺啜
庸非師名理迥未辨衆醒醉豈宜所以寄末世嗑
嗑尤恐遲永夜舒清光椽栴浮涼吹一隅啓微咏
萬古安遐思良久冀有得澹焉空素磁渴羌咲能
解冥漠心能知東鄰擊肥牛詰旦來勿辭咄哉口
腹累寧被鴟夸嗤

仲夏吳雪蓬自土木歸見枉有作

避炎思出塞望遠久徘徊
秃筆垂囊見顛毛戴雪
來交憐牆宇舊吟比
邃聲哀清夜無遺感
風堂颯
沓開

月涼茗飲歌

廣庭摩腹風脩脩
缺月半挂濕柳條
小童支鐺煮
宿雨耳畔彷彿鳴
江潮地偏澤滷恒
忍渴鹿車閒
挽滿井遙寒泉行
地寡風味乳花紅
釀愁相澆日
前飛鞚致春薜郎
官例賜隨蟬貂天
人之糧不多
得栝勺未可驅塵
囂銀餅緘貯出素
手靴紋感皺

涵清嬌我行擬作梁肉廷名嫌紗帽非高超為憐
好友餽唐貢一升滿淪憐中宵又聞養疴忌內汗
瘦腋寧讓盧仝驕茗柯有理慎莫憚解事徒獻陽
穀椒

送程正路之黃陂丞兼懷赤方先生

平生獨竒尚紳笏一時情羨爾濯髯處窅然江水

清先賢妙為政游藝幸無名

二程夫子
生尉舍中

舒卷青雲內

非同骯髒行

畫家遵北苑墨法秘南唐二者能兼得茅齋竟夕
香嗜交尤念舊汲引愧為郎舉轡黃州近全身問

楚狂

餅菊

餅菊饒天意含芳入仲冬南窗欣有托東里漫爲
容枯槁非時賞蕭疎與客供樊籬方集霰高枕悟
黃農

插餅菊夜供有感

肺熱中宵甚書堂細雨孤雁鴻深杳杳草木感區
區顧影分叢咲移根賤色殊盧奴勤采掇風候斷
懸壺

咏後陶香爐

垂老餘閒拂拭中寒灰活火十年功色難初擬侔
蒸栗丹在何期學煉銅鼓鑄舊型終不改薰當小
炷與誰同內焚香
曰薰當可憐羔袖龍鍾後家世風稜畫省
東

咏桐君木枕

曲木如肱便可眠全身清戒白雲前何甘糟粕羣
容與自近淳龐益醒然富貴兩端詳夢久乾坤一
息弱絲牽枯心更際無名欲應有微言問杜鵑

咏次山藏劍

琉璃匣內泊無形屈蠖龍身自杳冥徒手力前餘

骯髒明眸相顧益娉婷一揮舉世頭俱白留待吾
徒鬢尚青瀕洞風塵少年事好將寶氣護文星

咏上若澄泥硯

耕有平田釣有陂爲陶年月幾何時前人泥土珠
璣貴中古文章草木爲自試墨華藏小閣休呼綠
鐵惑諸兒尋常柿葉題情處又有蟲吟出廢基

冲谷四兄寄詩索擁臂圖並嘉子學天竺
書

再報東臯一尺書哦詩松下晚涼如長城近日無
堅壘末路相看有敝廬甚願加餐燕玉暖少憂問

病梵天虛鬢絲禪榻論情性遶匣蟲魚已廢除
無遮願力合人天淨饌頻張侍講筵大部僧陀徒
譯字終年郎署反安禪空華想落滄江上故紙塵
勞繡佛前能事松枝許相易蕭齋揮灑舊爐煙

月夜書懷

今夜月光厚草堂殊未吟初疑近邊雪相顧滿華
簪一雁離羣早三年觸痛深荆花吹片片咫尺故
園心

連雨團圓節

京師以中秋
夜爲團圓節

虧盈此際看層霄無點翳

破鏡喜平安暖憶姜肱被羞彈卜式冠牆東讀書

地修葺莫彫殘

小軒闢除已移居其中有懷子猷

舊營茅棟憶江臯
几席虛明似小舫
白堊常年無改作
清宵一侶足遊遨
塵沙實積菴摩內
兒豎全矜畫墁勞
稍待月寒垂北戶
地爐煨酒快乘尻
苦憐幽境閉門成
一日長窗倍眼明
臘雪竟宜添薄竹
藜牀猶是面寒城
鹿皮淨結雙趺穩
煙宇閒飛數翼輕
頻念江鄉點梅萼
思君脫帽趁逢迎

西堂飲歸

城闌月寒暮煙重
廣衢淨掃無飛鞚
吾生緩步信

可歸近市何暇誇羣從一升已盡絮帽熱數語不
出衡門送輕風吹鴉滿樹頭石渠丈八今含凍久
聞西田新秫美釀成別調如秋水與子薄收計十
斛糟丘一築無堅壘泥塗未足憂輕屣

南軒種竹

西堂南關市爲鄰擬種檀欒障午塵論尺勝求寒
水玉攜錢常避早朝人

古寺涼風挽鹿車貴唯買竹賤稱書遄歸不用憂
長夏手檢閒枝挂葛裾

儘有青光護藥闌却因石磴想風湍水文簾外立

晴晝嫋嫋亭亭三十竿

棟亭詩鈔目錄

卷二

射堂晨霽 四月八日

漁村

在婁門
右側

移竹東軒和高竹窗學士來韻

十三夜南樓看月

十四夜東署看月與葉桐初梅梅谷同用才

字

十五夜射堂看月寄子猷二弟

尤悔菴太史招飲揖青亭即席和韻

東署飲竹下喜上若自維揚來

泛舟虎丘觀獲得菊字

月夜舟泊惠山過秦園

石湖泛舟

積雪

虎丘雪霽追和芷園看菊韻寄松齋大兄筠

石二弟

韓慕廬學士見貽盆梅置軒中偶成

植夫下第見枉西軒兼懷次山

清明日雪蓬自白門來分得仙字

北院鶴

聞芷園種柳

用少陵春日江村
五首韻寫寄子猷

菜花歌

雨阻不得入城和梅岑

鄭谷口將歸索贈

胡靜夫先歸白門即席同用依字

十六夜登虎丘作

題堂前竹

夜泛湖至董氏園登閣和子猷韻

聞蛙

菊露和酒

和芷園消夏十首

磁枕

曝書

竹簟

葵扇

盆荷

蕉窗

茗椀

冰盤

碧筒

滌硯

過葉星期二棄草堂留飲卽和見贈原韻

西園種柳述感

後陶留飲香河書屋

粵中丞送孔雀感其遠懷留止官舍作詩寄
之

集余園看梅同人限字賦詩追憶昔遊有感
而作

葺治亭後竹徑和牧仲中丞韻

祀竈後作

由普德至天界寺入蒼翠菴看梅曾爲鄭谷
口別業漫題二首

二十八日偕朴仙看梅清涼山同賦長句

雪霽夢遊漁村和桐初留別詩並寄懷慕廬
學士

送孫伯琴之揚州

贈程吉士

和靜夫謝送惠山酒

題棟亭夜話圖

甲戌仲夏二十二日有吳門之役午憩句容
驛院夢爲投瓊之戲予素不解此醒與客
論其禎祥真不異夢中說夢也又記歐公
札闡洪庥語幾于脫頤因題數語命客書
于壁以爲他日來往笑柄

惠山題壁

松茨四兄遠過西池用少陵可惜歡娛地都
非少壯時十字爲韻感今悲昔成詩十首

銅鼓歌

春寒偶題

棟亭詩鈔卷二

千山曹寅子清謨

射堂晨霽

四月八日

久雨逢晨霽寒衙及午蒸獨來堪脫帽四月不飛
蠅烏米離鄉飯青山苦行僧天池與林屋祇用一
枝藤

漁村

在婁門
右側

麥熟午風輕輕舟信水行野農時一餉漁父久相
迎舊藥安泉氣清眠樂鳥聲悠然無可屬此日眼
俱明

近郭村皆好漁村水護門征徭間架少風俗筍梁
存草木深相引衣裳野莫論頻來何所事濯足卧
雲根

失意滄江舊收綸東更東扁舟對茅宇落日度河
風放鴨村村女承蜩樹樹童無人更相信此地兩
三翁

移竹東軒和高竹窗學士來韻

稚子龍鍾當戶多北堂曾種向南坡魚竿都任兒

騎馬

予種竹南軒有十年
相顧剩魚竿之句

鵲玉還矜客琢珂

予有亭名鵲玉以二
亭半有老槐也

十八年餐朔雪三千餘里隔江波移來檻外深相

似早有清風拂綺羅

此君十六未云多
旋馬廳前旋築坡
光藉綠沉先擗管
徑滋碧滑少鳴珂
身無鳳德難諧俗
日對雲心與逝波
尤怪南鄰閒酒伴
滿量烏榼覆紅羅

十三夜南樓看月

水鄉月色真娟妙
獨夜東吳靜賞偏
澹處祇容山濯魄
秋來方信客登天

北人謂蘇州爲天堂

一聲清笛如尋伴

七里遊人未滿船
直北再瞻兵氣勁
龍沙早雪是

今年

時大軍北征

十四夜東署看月與葉桐初梅梅谷同用

才字

高樓玩月獨徘徊東署荒涼今夜來
修飾似曾須斧鑿清真誰謂出塵埃
桂枝竹葉連秋草山影河光半酒杯
自信端憂無暇日綠苔堪惜謝家才

十五夜射堂看月寄子猷二弟

西署徵歌東署聞南樓送酒北堂醺
人間清夜無拘束千古歡場孰冠羣
八月鄉關多過雁中年心事祇看雲
侍香班散聯吟去疎柳長牕坐卯君

尤悔菴太史招飲揖青亭即席和韻

蘇家巷口揖青亭間日重登山更青籬
落不妨騎

馬客郎官原近老人星三秋鵝實身前樹

亭側有大棟合抱

二寸魚吹水上萍却笑南園成獨醉

是日諸君皆不飲

滄浪

咫尺喚難醒

東署飲竹下喜上若自維揚來

故人連袂至秋竹氣蕭森芒屨天如約匏尊世不
尋長閒一日雨過去十年心放浪東軒內庸誰寄

酒箴

時尚饒名理吾人醉入微清談原不飽白日豈徒
歸竹葉杯無底桃花水忽飛風流兼二阮秋被滿

書帷

泛舟虎丘觀獲得菊字

佳晨得羣遊即事異
軒軸坐持一杯酒
移賞竟雲木茲丘不厭登
城郭已迴矚清歡
寄人表今日寡
絲竹秋旻易變
黷賓主共沾漉
回舟看稻穗
歲事喜初熟
登登塲杵鳴
霽霽茅簷簇
還剝長蕩菱
思把故園菊

月夜舟泊惠山過秦園

直爲梁谿一繫船
夜山風露共蒼然
行來鐘歇空園裏
坐覺茶甘秋樹邊
池影低枝多宿鳥
月明此處却聞泉
畦丁欵客渾常事
應怪深宵數笠圓

石湖泛舟

八月秋山畫不成萬松梢上夕光清獨來捲幔無人見雲在澄潭着底行

船裏看山拂衆情看山兼愛石湖名無端野鳥渾

相識客飲一杯啼一聲

是日水鳥鳴不已以此催盃

積雪

積雪光連曉疎窗映處明夢闌紛纒眼風起不聞聲舊宇迎曦早餘寒閏歲成星星撲殘火虛白浩吾生

虎丘雪霽追和芷園看菊韻寄松齋大兄

筠石二弟

鬢絲寒颺五湖風殘雪山山浪打空今日酒醒橋

萬里春帆不趁馬頭東

是日騎馬
至臯橋

城角飛鴉無定時東園蕭瑟九花遲紅姑子爛三

塘晚那及吾家鹿目籬

黯黯微霄玉塔光僧廬稠疊臘梅香一年說餅鄉

愁劇醞點吳茶似酒黃

畫圖可耐客思家羔袖凭欄望已賒歸去東軒好

筠竹夜窗深玩海紅花

韓慕廬學士見貽盆梅置軒中偶成

遠煩健步移春至恰被春寒勒未開
瑾戶又經三日雪
盼花先長一盆苔
氣條鬱鬱將驚蟄
拊萼重
重漸抹腮
最忌隔年澆臘酒
市橋方法總凡材

植夫下第見枉西軒兼懷次山

官舍漁村似王郎
單舸來江湖行尚早
歌泣世何哀
書籍春庭閣
梅花高院開
眼中人老少
離合憶陳雷

清明日雪蓬自白門來分得仙字

吳筠相問訊時節
各淒然雨色南園柳
鄉情白下船
倦遊寒食後
邀客午廳前
同舍清無比
蹉跎類

學仙

北院鶴

四鶴不同致，翛然神迥超。
迭鳴如在野，羣謫未歸霄。
深恨羽毛貴，誰加園囿遙。
幾時移密竹，休沐靜相招。

聞芷園種柳

用少陵春日江村五首韻寫寄子猷

遙聞行藥處，冉冉柳枝深。
碧色時開眼，年華自賞心。
鳴禽音易革，永日向重尋。
天外春帆客，飄搖感至今。

易植吾鄉柳，叢生孰計年。
移來遵僻路，常是伴寒

泉小院清陰合長渠細溜穿知君有幽意處處寫
江天

惜樹齋前樹疎花綴小紅獨遮西下日不礙北來
風食益瓜蔬飯行嗟襜褕翁千條兼萬縷長短故
園中

故園何所有白石與蒼苔寂寞終無用婆娑豈不
材柔絲青可把愁絮撥難開惆悵橫戈地秋風拂
馬來

射圃空心柳他鄉也自生風蟬紛去住朝菌等枯
榮已得長眠嬾還成暢舞名蒼茫疑萬里只此共

離情

菜花歌

吳中菜花天下無，平疇照耀黃金鋪。朝陽夕陽幾
百里，惟剩白水連青蕪。四月吳中春事足，四郊花
氣穿城瀆。平分千巷畫船閒，農家兒女無拘束。農
家兒女飯出遊，踏歌不出畦。兩頭頭蠶繅絲二麥
穗，油菜結子柔桑抽。勸農使者停征稅，廳前畫諾
花前醉水曹。散吏舊期門也，騎細馬傍山村。君不
見他鄉井逕無尋處，春風遠拓黃花戍。含哺鼓腹
只吳儂，菜花中朝菜花暮。

雨阻不得入城和梅岑

霖雨疎還密，霉天暗復明。
書帷蚊蚋大，官閣莓苔生。
競渡傷吳俗，沿城滯越兵。
期君舟楫外，阜蓋豈難擎。

鄭谷口將歸索贈

素箏濁酒舊相於，少日論文尚嘯嘯。
執戟起家同避世，荷鋤歸隱即真儒。
官蛙激耳胸鳴好，古篆連牆屋漏俱。
獨趁吳波清駛去，臨行聊為捋髯鬚。

胡靜夫先歸白門即席同用依字

十竹秋來好，連宵咏式微。
獨攜詩卷去，不食鱸魚

歸棟葉夢難數柴門靜可依吳船快于馬遲我坐
漁磯

十六夜登虎丘作

虎丘深夜上寒月似晴花出定無僧看同遊有客
誇閣門彈指見石片席茵斜路熟來如夢輕舟信
是家

樹杪浮鴛瓦果愚望處明歲蕤寒不鎖鈴鐸夜微
鳴人散星千點天高雁一聲吳煙正曠顛絕頂可
同行

題堂前竹

野竹垂梢暗一庭經年坐對迥忘形誰勤插棘防
高榦近喜穿泥發小丁地缺秋窮宜長王天寒日
暮自娉婷有時騎馬街南去遙看牆陰接尾青
此地還爲幾姓留懸知種竹不須求箇中吟嘯亦
難事眼外陰晴皆好秋將築小谿通鶴步豈勞殘
臘祝狸頭晚風灑灑長簷下九月瀟湘可卧遊

夜泛湖至董氏園登閣和子猷韻

路憶探梅處沙頭略約平秋林亂榛莽遊騎暗怍
營往事水螢散隔谿風鐸鳴羣山好相見來日敞
雲楹

黯黯梅花夢蒼蒼桂樹林不成招隱賦終負歲寒
心澤國鴻來晚天涯夜共深浮生尚何冀此際更
須斟

聞蛙

新竹搖夕涼蕭蕭四簷井寓目意已愜傾耳物難
靜所嗟草木蕃沐此風露永昆蟲各任時日月不
停景南園舊經行陂塘盛藻荇長竿投黽媒隨手
墮苓箬貪殘實口累塞淵忌心秉誰能犯虎乙終
是挈魚丙一鳴胸已竭合羣氣方騁我官同蠹氏
清夜聽閒吟忽憶寒蟬號西風發深警

菊露和酒

甘菊黃白花爵之駐玉顏方書雖足徵服食媿嶼
蠻重鉛以爲郭鼎器通玄關蒸茗得物理采掇良
非艱日出筐筥香夕火聞潺湲泊然結爲露側注
歸彎環久飲目絕翳腦滿髮不斑將遺山澤臞鑿
坏同石頑還念高陽舊苦辣摧肺肝攪和久有法
解熱需清寒連瓶傾一杯新意衆已歡固緘比大
藥執守命小鬟何辭倒渴烏用是光盤餐逍遙北
樓上壓飯當陽山

和芷園消夏十首

磁枕

小睡長天勝靜持東齋清秘枕中蕘嫩涼一息應
誰較除是遽然自得知

曝書

十五年間萬卷藏中年方覺曝書忙遙憐揮汗續
繙處時有微風送古香

竹簟

七尺莢笙帖腹便消除一日夜涼前故鄉此物非
殊貴不設紗幬恣意眠

葵扇

束帶那容不受塵放衙天許作閒身老槐門巷風
猶昔來捉蒲葵得幾人

盆荷

西窗荷葉大如盤煙雨尋常作畫看三十六陂身
已到不勝清冷欲歸難

蕉窗

昔年築室類吳舫曾有微言托綠蕉聞道春帆同

一色可能拄笏坐終朝

春帆芷園齋名

茗椀

卯君茶癖與吾同對客長愁放椀空近日衙齋須

藥裹一杯清澹只寬中

冰盤

絺窗木榻靜無蠅
內窖常支過午冰
回憶吳中應
一笑紅鹽不下減風稜

碧筒

白玉蓮花手作杯
掬香一石玉山頽
平生狂飲無
拘泥解折荷涼第幾回

滌硯

宿墨能除硯始靈
多生于此獨忘形
何由一致中
冷水鸚鵡長教潑眼青

過葉星期二棄草堂留飲即和見贈原韻
石橋乘興去山遠跨塘秋二棄君何取孤蹤我自
浮不同吳市隱初罷把人憂曲徑深延佇芙蓉面
面留

野亭清可畫多竹少芭蕉石穩行穿澗椽稀坐見
霄遙呼如荅嘯雄辯久騰驍九月胥江濶輕舸逆
晚颺

高士今誰在深杯問素心魚天舒細靄雁陣播寒
音弔屈難重賦遊梁只一琴

時坐有
鄭賈生

相思無遠近來

往即山林

西園種柳述感

在昔傷心樹重來年少人寒廳誰秣馬古井自生
塵商略童時樂微茫客歲春艱難曾足問先後一
沾巾

再命承恩重趨庭訓敢忘把書堪過日學射自爲
郎手植今生柳烏啼半夜霜江城正搖落風雪兩
三行

後陶留飲香河書屋

老厭燕南閱歲華昇州客舍酒重賒無多柳葉連
橋暗漸減冰嘶落照斜舊事隔城愁上馬

燕郊留飲
多爲門禁

不成醉
散去

新年賀節獨君家不辭半醉籠鞭去待看北

山桃花

粵中丞送孔雀感其遠懷留止官舍作詩

寄之

曾聞粵客珊瑚價初識交州孔翠奇絕嶠籠閑能
致遠遐方珍貢自乘時荒衙闔戶蓬爲珥瑣印餘
糧鶴獨支何事投棲來萬里故人情好未相宜
中庭矩步意難安牆角梳毛雨漸乾不用襦褌誇
組繡還因羅網念鷓鴣眯盲空謝西施贈點染徒
煩荔子丹他日翻全應放去郁伊絳彩戲林端

集余園看梅同人限字賦詩追憶昔遊有

感而作

詰曲春城似水村暫遊風日倍清溫誰家芳草多
延坐一半名園悞叩門丘壑重重翻畫稿梅花故
故點山尊頻年漫信能分別耐可巡簷細討論
鄧尉西谿不可名清涼幾樹獨關情鳩車竹馬曾
經處鮐背龐眉識此生終古朝花愁暮落早春閑
雨暢新晴杯闌即賞江光妙表裏澄鮮徹眼明
灑掃風堦望欲迷十春重坐此枝西雲山不改詩
常在草木同歸物未齊

昔年曾與此山初
明遊清涼看此花

寺憶聽經張

淨饌人疑發甕檢前題午天一夢空花碎處處飛
鴻印爪泥

重據舊緒感新悰祇合澆春罄百鍾杖履縱橫開
小徑崖阿升降撫層松迥非金粉當年氣各保冰
霜異日容末坐一編應記取梅花分社半山農

分社

葺治亭後竹徑和牧仲中丞韻

我本荷鋤人何妨負鋤與跬步春園空蒼然隔林
語

闢草古徑出汲水冰池開此君煩灑掃不厭數能

來

老竹折不回
迸根滿左右
瓦礫亦何常
夕陽空負手

虛亭尚無名
餘靄陰交加
箇中雖見小
坐看四時花

水竹賞無時
疎籬防一匝
朝驅白項鴉
夕柵綠頭鴨

官閑一事幽
竟日可淹留
幸不求吾是
棲棲元道州

祀竈後作

除騷餘閒夜粥遲棟亭兀坐自吟詩生平暴殄書
堆裏已斷庚申那得知

剗羊剥棗竟無文祈福何勞祝少君所願高堂頻
健飯燈前兒女拜成羣

楮火連街暎遠天歲行風景倍凄然江城爆竹聲
何據一片錫香三十年

由普德至天界寺入蒼翠菴看梅曾爲鄭
谷口別業漫題二首

出寺復入寺一年閑馬蹄谿山遊不遠井徑路多
迷浩劫前王造微名過客題循廊還幾許幽處凍

儂樓

小院通山翠，輕紅兩樹花。禪枝無夢想

俗以冬樹為夢樹

善

果歷塵沙

梅側有枇杷樹近百年已抱子矣

覲面堪危坐，臨風但啜茶

子真遺墨在，起歎日將斜

二十八日偕朴仙看梅，清涼山同賦長句

一冬無雪雨亦好，連晨江霧梅開早。水曹寒官封

印來，避債何嫌拉。詩老空山，楚楚花寂寞。園丁得

意先除掃，似與繁英送。小年轉憐炙背，當晴昊。陽

和爾我同閒適，春色人情破。懊惱休辭洗盞，勸紅

香苦笑。塵顏加粉，澡漫漫。桃李東風事，孟婆合阜

誰能保飛來翠羽正啁啾冉冉斜陽坐衰草

雪霽夢遊漁村和桐初留別詩並寄懷慕

廬學士

爐煙繚碧窗凝白起戀黃綢煖睡餘凍鵲一聲如
裂帛殘英幾點亂霑書剎那春夢身先覺咫尺漁
村徑早除為問比來何事健客來還解佩邊魚
人日棟亭人卧雪二年燈火樂三餘不愁食指無
晨爨常媿寒家有賜書貧士孤雲元合調初寒厄
閨費乘除碧澄坊裏如相待布穀聲中看網魚

送孫伯琴之揚州

個儻風流妙說詩孫郎簡嘿亦吾師枯棋濁酒無
多日彈指粘燈放鷓時
春山兩岸碧連蜷自在江流雪後天好去攬身圖
畫裏不妨擁鼻米船邊

贈程吉士

鬚如蝟磔口經義放膽能論天下事足不窺園又
十年後生可畏真難器梨譌伐臙鷓冠子腹笥一
啓如流水送子春江路正泥雪晴小住爲佳耳

和靜夫謝送惠山酒

折券難憑守口瓶醇醲何幸托蘭馨從來第二斯

無憾宜補茶顛陸羽經

神漢惟甘秋露辛內家法釀只愁醇滑嵇腹大原
無論畫榼仍留待晚春

題棟亭夜話圖

紫雪冥濛棟花老蛙鳴廳事多青草廬江太守訪
故人建康並駕能傾倒兩家門第皆列戟中年領
郡稍遲早文采風流政有餘相逢甚欲抒懷抱于
時亦有不速客合坐清嚴鬪炎熇豈無炙鯉與寒
鷄不乏蒸梨兼滄棗二簋用享古則然賓酬主醉
今誠少憶昔宿衛明光宮僇伽山人貌姣好馬曹

狗監共嘲難而今觸痛傷枯槁交情獨剩張公子
晚識施君通紆縞多聞直諒復奚疑此樂不殊魚
在藻始覺詩書是坦途未妨車轂當行潦家家爭
唱飲水詞那蘭小字幾曾知斑絲廓落誰同在岑
寂名場爾許時

甲戌仲夏二十二日有吳門之役午憩句
容驛院夢爲投瓊之戲予素不解此醒
與客論其禎祥真不異夢中說夢也又
記歐公札闢洪庥語幾于脫頤因題數
語命客書于壁以爲他日來往笑柄

行役有餘暇驛亭無俗聲遠攜柎榴枕午睡華陽
城清風惠然至濼濼因之生意于將化胥反爲蟻
鬪爭憑陵叫袒跣未讀五木經茲夢亦云怪萊祭
非人情卜言勝者吉予寤氣已平請客勿獻疑理
絕智不明平居澹志慮懷抱鮮經營造物適爲戲
得喪安足驚微涼順夕月束帶仍遐征

惠山題壁

積書巖下小池通确犖行穿複壁中忽闢空堂感

新咏鄰家慘澹杏花紅

顧梁汾小園中新咏
堂乃故友成容若書

合抱楓香老桂枝卧雲堂上舊題詩茲身久分無

丘壑可羨秦家濯足池

主人暑月邀濯足澗中

松茨四兄遠過西池用少陵可惜歡娛地
都非少壯時十字爲韻感今悲昔成詩

十首

西池歷二紀仍蒸短檠火簿書與家累相對無一
可連枝成漂萍叢篠冒高竒歸與空浩然南轅計
誠左

今夕良讌會今夕深可惜况從卅角遊弄茲蓮葉
碧風堂說舊詩列客展前席大樂不再來爲君舉
一石

閑居咏停雲遽若戀微官行葦幸勿踐稅駕良匪
難寸田日夜耕狂瀾無時安恭承骨肉惠永奉筆
墨歡

竒雅慕古人其次思與俱猗何謝太傅陶寫托笙
竽榮名罰恒憂服食不須臾瞑眩莫有瘳聲伎安
能娛

勾陳逼招搖幽天風夜至單于六羸走羽林呼動
地三驅度瀚海持冰裹糗糒念我同胞生旃裘擁
戈寐

吾宗詩淵源大率歸清腴叔氏振頽風句不修廉

隅選友得關中沈雄避時趨會應策驥裹歷塊過
名都

黃鐘散爲徵太音聲久希前賢橫專據各得具體
微盲瞽不安命小儒多腹非有斐貴切磋且願誦
緇衣

曩年拓強弓齒牙一何少腸肥腦復滿猛敢過鷹
鷄軒起觸四隅周肱不可趨茫茫紅塵中末路炳
龜焦

伯氏值數竒形骸恒放蕩仲氏獨賢勞萬事每用
壯平生盛涕淚萬里幾悽愴勗哉加餐飯門戶慎

屏障

酒黨日以散婚宦方乘時交遊山水間町疇羅松
茨貨殖非所好歛段無不之汙汙大江流煙霞相
與期

銅鼓歌

雅州銅鼓烏羽青四蟾蜍紐鏤虺形豈堪懸注肆
考擊或疑烹飪充蠻廷又云丞相渡瀘時鑄以張
軍留模型前賢遺迹不可測語患怪誕多離經物
非適用貴取意居常磨洗來寒廳納水三斛副是
腹爬梳膩垢光而熒毫芒差若列支紀圍轉直可

窺盤星刑天獨舞猛志在一于腐朽求精靈豪華
徒誇子父鼎賞鑒何重哥窑餅堦除蔓菁吐紫雪
吾方灌溉開瞳町

鼓面若儀器四紐峙立疑
可測驗水土以待知者

春寒偶題

一月春寒春漸忙連晨集霰雨浪浪侍兒旋撥薰
籠火從騎新油貯酒囊梅比隔年添料峭燕來新
社轉淒涼無邊勃鬱東風意遽許青紅眩太陽